

## Evening Dogri (NSD) Bulletin 15-06-2024

### आकाशवाणी

खास खबरां .....

- 1 प्रधानमंत्री नरेन्द्र मोदी जी-7 शिखर सम्मेलन च शामिल होइयै अज्ज मुख् वापस आई गे न, उनें आखेआ जे उनें विश्व मंच पर भारत दा नजरिया रखेआ ऐ।
- 2 शिखर सम्मेलन दे बाहरें मोदी होरें केई मुख् दे राष्ट्रध्यक्षे कन्ने दपक्खी बैठकां बी लाइयां।
- 3 स्विट्जर्लैंड च अज्ज यूक्रेन लेई अंतर्राष्ट्रीय शांति सम्मेलन दा आयोजन।
- 4 केन्द्री गृहमंत्री अमित शाह होर जम्मू कश्मीर दी पूरी पराती सुरक्षा स्थिति दा जायजा लैने लेई कल इक आला सतह दी बैठक लांगन।
- 5 छत्तीसगढ़ दे बस्तर च सुरक्षाबले कन्ने लग्गे दे इक टाकरे च 8 माओवादी मारे गे न।
- 6 उत्तराखंड च ऋषिकेश-बद्रीनाथ जरनैली शिड़कै पर इक टैम्पू ट्रेवलर दे शिड़कै परा रूलकने कारण पेश आए दे हादसे च 13एं जनें दी मौत।
- 7 राई-बाई मंत्री शिवराज सिंह चौहान होरें दस्सेआ ऐ जे प्रधानमंत्री होर 18 जून गी किसान सम्मान निधि दी अगली किशत जारी करगंन।
- 8 आईसीसी टी-20 विश्व कप च अज्ज ग्रुप स्टेज दे खीरी मैच च भारत दा मकाबला कनाडा कन्ने होग।

<><><><><><>

## PM Return

प्रधानमंत्री नरेन्द्र मोदी होर ईटली थमां अज्ज बडलै नमीं दिल्ली परतोई आए न। प्रधानमंत्री होरें इस दौरे गी कामयाब ते सार्थक दस्सेआ ऐ। इक सोशल मीडिया पोस्ट च उनें आखेआ जे एह इक महत्वै आला जी-7 शिखर सम्मेलन हा, जित्थें उनें विश्व मंच पर भारत दे नजरियै गी पेश कीता। विदेश मंत्रालय नै आखेआ जे इस दौरे च जी-7 संगठन तैहत मुख् वैश्विक मुद्दें पर सार्थक गल्लबात होई। मंत्रालय नै गलाया जे इस दरान शिखर सम्मेलन च हिस्सा लैने आले देशें कन्नै भारत दी सांझेदारी होर बी तगड़ी होई ऐ। श्री मोदी होरें दौरे दरान जी-7 शिखर सम्मेलन च हिस्सा लैता। उनें ईटली दी प्रधानमंत्री जियोर्जिया मैलोनी, बरतानिया दे प्रधानमंत्री ऋषि सुनक, फ्रांस दे राष्ट्रपति इमैनुएल मैक्रों ते यूक्रेन दे राष्ट्रपति वोलोदिमिर जेलेन्स्की सनें नेकां लीडरें कन्नै दपक्खी गल्लबात कीती। प्रधानमंत्री नरेन्द्र मोदी होरें “ग्लोबल साऊथ” दिएं चैताएं पर चेचा ध्यान देने दी जरूरतै पर जोर दित्ता ऐ, टकोहदा करियै अफ्रीकी मुल्खें दिएं समस्याएं ते चुनौतिएं पर। उनें टैक्नालोजी दे क्षेत्र च मोनोपली गी खत्म करने पर जोर दित्ता ते आखेआ जे इक समावेशी समाज दी नीह रखने लेई इसी रचनात्मक बनाया जाना लोड़चदा ऐ ते समाजी ना बरोबरी ते फर्कोफर्की गी भलेआ खत्म कीता जाना लोड़चदा ऐ। जी-7 दे आउटरीच सत्र गी संबोधत करदे होई श्री मोदी होरें आखेआ जे ग्लोबल साऊथ दे मुख् दुनिया भरै च बनी दी यक्कोतक्की ते तनोतनी दा खमेयाजा भुगता करदे न। उनें आखेआ ते टैक्नालोजी गी रचनात्मक बनाया जाना लोड़चदा नां कि तबाही दा कारण। उनें आखेआ जे आर्टिफिशल इंटेलीजेंस गी साफ सुथरा, पारदर्शी, सुरक्षत, जिम्मेवार ते हर इक दी पुज्ज तोड़ी पजाने लेई भारत सब्बने गी सैहयोग देग। उनें आखेआ जे ऊर्जा दे क्षेत्र गी लेइयै भारत दा राँ 4 सिद्धांतें पर आधारित ऐ, जिंदे च चार “ए” शामिल न। पैहला अवेलेबिलिटी यानि दस्तेयाबी, दुआ आसेस्सेबिलिटी यानि पुज्ज, त्रिया अफोर्डेबिलिटी मतलब हर कुसै दी थवीक अंदर ते चौथा सिद्धांत ऐ एक्सेप्टेबिलिटी यानि सब्बनें गी मंजूर। मोदी होरें जी-7 समूह गी ओहदी 50मीं बरे गंड दे मौके पर ममारकबाद ते शुभकामना दित्तियां। प्रधानमंत्री नरेन्द्र मोदी

होरें केई मुल्खें दे नेताएं कन्नै बी बक्खरे दपक्खी बैठक लाई। जापान दे प्रधानमंत्री फ्रूमियो किशिदा हुंदे कन्नै लग्गी दी बैठका च दौने नेताएं उद्योगिक क्षेत्र च सैहयोग ते सांझ भेयाली बधाने पर चर्चा कीती। मोदी होरें आखेआ जे उंदी त्रीए कार्यकाल दरान बी जापान कन्नै दपक्खी सरबंधें गी होर मजबूत करने दा सिलसिला जारी रौहग। भारत ते जापान मुंबई अहमदाबाद हाई स्पीड रेल परियोजना ते भारत जापान उद्योगिक सैहयोग तैहत् किट्ठे रलियै केई महत्वपूर्ण प्रोजेक्टें गी तोड़ चाढ़ै करदे न। तोआई बरतानिया दे प्रधानमंत्री ऋषि सुनक हुंदे कन्नै मलाटी दरान दौनें मुल्खें अपनी कार्जनीति सांझ भेयाली गी होर निग्गर करने पर जोर दित्ता। अपने इक सोशल मीडिया पोस्ट च मोदी होरें आखेआ जे दौनें मुल्खें बश्कार सेमीकंडक्टर, प्रौद्योगिकी ते बपार क्षेत्र च सरबंधें गी मजबूत बनाने दियां बेशुमार संभावनां न। मोदी होरें यूक्रेन दे राष्ट्रपति ब्लादिमीर जेलेस्की हुंदे नै बी मलाटी कीती। जिस दरान दौनें मुल्खें बश्कार सरबंधें गी तगड़ा बनाने दे कन्नो कन्नी यूक्रेन दी स्थिति ते स्वित्जरलैंड आस्सेआ शांति लेई आयोजित होने आले शिखर सम्मेलन बारे बी चर्चा कीती गई। मेजबान मुल्ख ईटली दी प्रधानमंत्री जॉर्जिया मेलोनी हुंदे नै इक बक्खरी दपक्खी बैठक च प्रधानमंत्री होरें रक्षा सैहयोग बारे गल्लबात कीती ते मेद कीती जे दौनें मुल्खें बश्कार रक्षा उद्योगिक सैहयोग गी होर बधया जाग। दौनें नेताएं साफ सुथरी ऊर्जा, विनिर्माण, सांईस, अंतरिक्ष, दूरसंचार, महत्वपूर्ण खनिजें ते सप्लाई श्रृंखला दे बारे बी गल्लबात कीती। इस सरबंधै च उनें हाल च दस्तखत कीते गेदे उद्योगिक संपत्ति अधिकार समझौते दा सुआगत कीता जेह्दे नै बपार मार्के, डिजाइन ते पेटेंट दे क्षेत्र च बी सैहयोग बधोग। दौनें लीडरें ऊर्जा परिवर्तन च सैहयोग बारे सैहमति पत्र दा बी सुआगत कीता जेह्दे नै साफ सुथरी ते हरित ऊर्जा दे क्षेत्र च सैहयोग गी बी बढ़ावा थहोग।

<><><><><><>

## Switzerland

स्विटजरलैंड च अज्ज यूक्रेन शांति लेई इक सम्मेलन शुरू होआ ऐ। यूक्रेन च लड़ाई खत्म करने लेई केई देशों दे नेता उत्थें किट्ठे होए दे न पर इस किट्ठे च चीन शामिल नेई ऐ। जून तगर चलने आले इस दऊं रोजा सम्मेलन च कोई 90 मुख्य ते अंतर्राष्ट्रीय संगठन शामिल होआ करदे न। सम्मेलन च यूक्रेन दे राष्ट्रपति वोलोदिमीर जेलेन्स्की हुंदे शांति प्रस्तावें पर समर्थन जुटाने दी कोशत कीती जा'रदी ऐ।



## HM-High Level Meeting

केन्द्री गृहमंत्री अमित शाह होर जम्मू कश्मीर च सुरक्षा स्थिति ते श्री अमरनाथ जी दी सलाना यात्रा दी तैआरिएं दी समीक्षा करने आस्तै कल इक उच्ची सतह आली बैठक दी प्रधानता करगंन। गृह मंत्रालय नै दस्सेआ ऐ जे उपराज्यपाल मनोज सिन्हा, राश्ट्री सुरक्षा सलाहकार अजीत डोभाल, केन्द्री गृह सचिव, सेना, पुलस, जम्मू कश्मीर प्रशासन ते गृह मंत्रालय दे आला अफसर इस बैठक च हिस्सा लैंगन। श्री शाह होरें कल गै नमीं दिल्ली च गृह मंत्रालय दे वरिष्ठ अफसरें कन्नै बैठक लाइयै जम्मू कश्मीर दी सुरक्षा स्थिति दी समीक्षा कीती ही।



## Chattisgarh

छत्तीसगढ़ दे बस्तर संभाग च अज्ज सुरक्षा बलें कन्नै लगे दे टाकरे च 8 माओवादी मारे गे न। गोलीबारी च दऊं सुरक्षा कर्मी बी जख्मी होए न। बस्तर संभाग दे अबूझमाड़ इलाके च माओवादिएं दी मजूदगी बारे जानकारी थहोने परैत भारत-तिब्बत सीमा पुलस आईटीबीपी जिला रिजर्व पुलस ते विशेष कार्यबल, स्पैशल टास्क फोर्स दी सांझी टीमै अभियान शुरू कीता, जेह्दे मगरा अज्ज बडलै

टाकरा शुरू होआ। इलाके च तपाशी अभियान जारी ऐ। इस सरबंधे च होर ब्योरे गी बलगेआ जा'रदा ऐ।

<><><><><><>

## Uttrakhand Accident

उत्तराखंड दे रुद्रप्रयाग जिले च बद्रीनाथ राष्ट्री जरनैली शिड़कै पर रेनतोली कश सैलानिएं दी इक गड्डी दे खाई च पौने करियै 13एं लोकें दी मौत होई गई ऐ। हादसे च गंभीर तौरा पर जख्मी 7 यात्रुएं गी हवाई रस्तेयां एम्स रिषीकेश लैता गेआ ऐ, जिल्ले के होर दुए 7 जख्मिएं दा इलाज जिला अस्पताल च चला करदा ऐ। उत्थूं दे जिला मैजिस्ट्रेट ते पुलस सुप्रीटेंडेंट होरें हादसे दी जानकारी थ्होंदे गै राज्य आपदा कारवाई बल एसडीआएफ, अग्ग साहलने आले सेवां जिला आपदा प्रबंधन दिएं टीमें ते पुलस गी बचाह लेई तुरत रवाना करी दित्ता। राष्ट्रपति द्रौपदी मुर्मू, प्रधानमंत्री नरेन्द्र मोदी, गृहमंत्री अमित शाह, राज्य दे गवर्नर गुरमीत सिंह, मुख्मंत्री पुष्कर सिंह धामी ते केन्द्री गृहमंत्री अमित शाह होरें इस हादसे पर दुख ते बसोस प्रगट कीता ऐ। मुख्मंत्री होरें जिला मैजिस्ट्रेट गी इस हादसे दी जांच करोआने दे निर्देश दित्ते न।

<><><><><><>

## Nitin Gadkari-Karan Singh

शिड़क, ट्रांसपोर्ट ते राष्ट्रीय जरनैली शिड़कें सरबंधी केन्द्र मंत्री नितिन गडकरी होरें जम्मू कश्मीर दे साबका मदर-ए-रियासत डॉ. कर्ण सिंह हुंदी श्रीनगर आली रिहायश जाइयै उंदे कन्नै मुलाकात कीती। इस दरान केन्द्र शासत प्रदेश जम्मू कश्मीर च शिड़क ते राष्ट्रीय जरनैली शिड़कै सरबंधी औंदी परियोजनाएं बारे गल्लबात कीती गई। मीटिंग दरान क्षेत्र च सामरिक महत्वै आले मूलढांचे च बाद्धा करने बारे मुख्म ध्यान दित्ता गेआ जेहदा मकसद मेल-संपर्क च बाद्धा करना ते आर्थिक तरक्की च सहायता करना ऐ। गल्लबात दरान केन्द्री मंत्री होरें डॉ. सिंह

होरें गी जम्मू कश्मीर राश्ट्रीय जरनैली शिड़कै, दिल्ली-कटरा एक्सप्रेस वे ते जाजिला सुरंग परियोजना समेत बक्ख-बक्ख महत्वै आली परियोजनाएं दी प्रगति बारे जानकारी दित्ती।

<><><><><><>

## PM-Kissan

केन्द्री राई-बाई मंत्री शिराज सिंह चौहान होरें आखेआ ऐ जे प्रधानमंत्री नरेन्द्र मोदी होर 18 जून गी प्रधानमंत्री किसान सम्मान निधि योजना दे तैहत् 9 करोड़ 3 लक्ख करसानें दे खाते च कोई 20 ज्हार करोड़ रपे जारी करगंन। अज्ज नमीं दिल्ली च मीडिया कन्नै गल्ल करदे होई शिवराज सिंह चौहान होरें आखेआ जे पिछले 10एं ब'रें च अजें तगर 11 करोड़ करसानें दे खाते च 3 लक्ख करोड़ रपेया सिद्दा जमा कराया जाई चुके दा ऐ।

<><><><><><>

## ICC T-20

आईसीसी मर्दे दे टी-20 क्रिकेट विश्व कप च आयरलैंड खलाफ ग्रुप ए दा महत्वै आला मैच कल लगातार बरा'रदी बरखा करियै रद्द होने कारण अमरीका सुपर-8 च पुज्जी गेआ ऐ। एह पैहला मौका ऐ जे अमरीका अपने क्रिकेट इतिहास च इस गेड़ च पुज्जा ऐ। यूएसए ग्रुप "ए" थमां अगले गेड़ च पुज्जने आली भारत परैंत दूई टीम बनी गई ऐ। साबका चैंपियन पाकिस्तान ते आयरलैंड सुपर-8 दी द्रौड़ थमां बाहर होई गे न। भारत अज्ज फ्लोरिडा दे सैंट्रल ब्रावोड पार्क स्टेडियम च ग्रुप दे अपने खीरले मैच च कनाडा कन्नै खेड्डग। मैच भारती समें मताबक रातीं 8 बजे शुरू होग।

<><><><><><>

## Haj

अज्ज पूरी दुनिया थमां करीब 20 लकख लोक साउदी अरब च हज करा करदे न। पंज रोजा हज दी शुरूआत दे तौर पर कल सारे हज यात्रु मीना शैहर च किट्टे होई गे हे। लोह होने कोला पैहले दी नमाज पढ़ियै श्रद्धालु हज दी प्रार्थनाएं आस्तै अज्ज अराफात पुज्जे। अज्ज दा दिन जायरीन खास प्रार्थना ते खुदा कोला माफी मंगने आस्तै इत्थें बितांदे न। हज यात्री कल बडलै कुर्बानी दी रस्म अदा करने ते शैतान गी बट्टे मारने आस्तै वापस मीना आंगन। भारत थमां 1 लकख 75 ज्हार यात्रु इस पवित्र यात्रा पर गेदे न। इस ब'रे 5 ज्हार भारती महिला हज यात्रा बगैर कुसै महरम दे करा'रदियां न।

<><><><><><>

## Srilanka Yog

10में अंतर्राष्ट्रीय योग दिवस दे सरबंधे च श्रीलंका च 10 दिने दे योग महोत्सव दा सरिस्ता कीता जा'रदा ऐ। एह आयोजन भारतीय उच्चायोग दा सांस्कृतिक सीमा स्वामी विवेकानंद सांस्कृतिक केन्द्र करा करदा ऐ। अज्ज बडलै कोलंबो टाउन हाल च परोआरें ताई योग विशे पर इक कार्यक्रम दा सरिस्ता कीता गेआ। भारतीय संगठन सदगमय फाउंडेशन ते कोलंबो च गंगारामया मंदर दे सैहयोग कन्नै इस कार्यक्रम दा आयोजन कीता गेआ। समूलचे टापू 22 जून तगर नेकां कार्यक्रमें दा सरिस्ता कीता जाग।

<><><><><><>

## I&B

सूचना ते प्रसारण राज्यमंत्री एल.मुर्गुन होरें मुंबई अंतर्राष्ट्रीय फिल्म समारोह 2024 च एह घोषणा कीती ऐ जे वन्य जीवन पर आधारित फिल्मकार सुभया नल्ला मुथु होरें इस ब'रे दे वीत्रशांताराम लाइफ टाइम अचीवमेंट पुरस्कार कन्नै सम्मानत

कीता जाग। मन्ने परमन्ने दे ते पुरस्कार जित्ती चुके दे सुभया होर चेन्नई दे रौहने आले न। उनें वन्य जीवन पर अधारित सब्बने कोला लम्मी सीरीज फिल्म लीविंग ऑन द ऐज बनाई ऐ। आकाशवाणी कन्नै गल्लबात करदे होई श्री मुर्गुन होरें आखेआ जे इस ब'रे पैहली बारी इक दस्तावेजी फिल्म बजार दा सरिस्ता कीता जा करदा ऐ।

<><><><><><>

## Rail Link

उधमपुर—श्रीनगर—बारामुला रेल लिंक दा 338 किलोमीटर लम्मा महत्वै आला संगलदान—रियासी रेल लिंक इस म्हीने दे खीरै तगर कम्म करने लेई तैआर ऐ। परियोजना च एह इक महत्वै आला मील दा पत्थर ऐ ते मेद ऐ जे इस लिंक राएं म्हीने दे खीरै तगर इस रस्तेया रेल कटरा पुज्जी जाग ते कश्मीर घाटी गी रेल राएं देसै दे बाकी हिस्सें कन्नै जोड़ी देग। आकाशवाणी संवाददाता देवेन्द्र ठाकुर होरें दस्सेआ जे रेलवे दे आला अफसरें कल रियासी दे डिप्टी कमीशनर विशेष महाजन हुंदे कन्नै संगलदान ते रियासी ट्रैक दा निरीक्षण करियै ट्रैक गी शुरू करने आस्तै खीरी जरूरतें दा जायजा लैता।

<><><><><><>

## IMD

भारती मौसम विभाग नै उप—हिमालयी पच्छिम बंगाल ते उत्तर—पूर्वी भारत च अगले 4 दिनें च खरी मती बरखा पौने दी पेशगोई कीती ऐ। विभाग नै आखेआ ऐ जे अज्ज उप—हिमालयी पच्छिम बंगाल ते सिक्किम दे किश हिस्सें च मती बरखा बरोग। तोआई मेघालय ते असम च बी नेहा मौसम 18 जून तोड़ी बनेदा रौहग। मौसम विभाग नै दक्खन भारत च अगले 4 दिनें तोड़ी सख्त गर्मी पौने दी

पेशगोई कीती ऐ। उत्तर प्रदेश, दिल्ली, झारखंड, बिहार, पंजाब, उत्तर ओडिशा ते पच्छम बंगाल दे गंगा तट कन्नै लगदे इलाकें च तापमान 42 कोला 45 दे आसपास रिकार्ड कीता जा'रदा ऐ। एह्दे कन्नै गै दक्खन राजस्तान, उत्तराखंड ते छत्तीसगढ दे किश थाहरें ते हिमाचल प्रदेश च बी गर्मी नै अपना असर दस्सेआ। दिल्ली च मौसम विभाग नै गासै पर बददल घनोए रौहने ते 40 किलोमीटर प्रति घेंटे दी रफ्तार कन्नै तेज अंधी झक्खड़ चलने दी संभावना जताई ऐ। राश्ट्री राजधानी चअगले किश होर दिनें तगर बद्धोबद्ध तापमान 44 जां 45 डिग्री सैल्सियस दे कोल काल रौहने दा अनुमान ऐ।

<><><><><><>

